

## ADRODDIAD I'R CABINET

<b>Dyddiad</b>	<b>16 Ionawr 2018</b>
<b>Aelod Cabinet</b>	<b>Y Cyngorydd Peredur Jenkins</b>
<b>Pwnc</b>	<b>Trosolwg Arbedion: Adroddiad cynnydd ar wireddu cynlluniau arbedion</b>
<b>Swyddog Cyswllt</b>	<b>Dafydd L Edwards, Pennaeth Cyllid</b>

---

### Y PENDERFYNIAD A GEISIR

Nodi'r cynnydd calonogol tuag at wireddu'r cynlluniau arbedion 2015/16 – 2017/18.

---

#### 1. CYFLWYNIAD / CEFNDIR

Adroddir yma ar gynnydd gwireddu'r arbedion sydd yn Strategaeth Arbedion 2015/16 – 2017/18.

Yn Strategaeth Ariannol y Cyngor, roeddem wedi cynllunio £7,414,751 o arbedion yn y flwyddyn 2017/18. Mae gwireddu'r cynlluniau unigol yn gyfrifoldeb aelodau perthnasol o'r Cabinet, ac mae'r Aelod Cabinet dros Gyllid yn cadw trosolwg o'r darlun cyfan er mwyn adnabod unrhyw broblemau gyda'r drefn, neu unrhyw adran benodol.

Mae adroddiadau perfformiad yr Aelodau Cabinet unigol i gyfarfodydd yr 2<sup>ail</sup>, 9<sup>ed</sup> a'r 16<sup>eg</sup> o Ionawr eisoes yn manylu ar gynnydd gyda chynlluniau arbedion unigol o fewn eu portffolios, fel bo angen.

#### 2. CYNLLUNIAU ADRANNOL 2016/17 (a blaenorol)

Mae **Atodiad 1** yn crynhoi cyrhaeddiad pob adran yn erbyn y targed arbedion roedd wedi ei osod iddynt am y flwyddyn 2016/17, ac yn rhoi diweddariad o ran y cynlluniau sydd eto i'w gwireddu. O'r 144 o gynlluniau, mae 142 wedi eu gwireddu'n llawn neu yn rhannol, a disgwylir i'r ychydig o gynlluniau sy'n weddill gael eu gwireddu'n llawn yn fuan. Yn nhermau ariannol (£), mae 99% o arbedion 2016/17 bellach wedi cael eu gwireddu. Mae'n braf hefyd nodi mai dim ond un cynllun o 2015/16 sydd heb ei wireddu, ac mae dull o'i wireddu yn fuan wedi ei adnabod.

#### 3. CYNLLUNIAU ADRANNOL 2017/18

Yn yr un modd, mae **Atodiad 2** yn crynhoi'r rhagolygon presennol o ran gwireddu cynlluniau ac arbedion 2017/18. O'r 122 o gynlluniau, mae 103 wedi eu gwireddu'n llawn neu yn rhannol, a 7 pellach ar drac i'w gwireddu yn amserol. Yn nhermau ariannol (£), mae 77% o'r arbedion ariannol eisoes wedi eu gwireddu, a 3% pellach ar drac i'w gwireddu.

Mae'r ffigyrau "llithro" yn cynnwys yr her sylweddol o wireddu nifer o gynlluniau yn yr Adran Oedolion a'r Adran Plant.

Yn f'adroddiad blaenorol i'r Cabinet 19 Medi, cyfeiriwyd at fwriad Pennaeth yr Adran Oedolion i gyflwyno adroddiad yn amlinellu ei ddymuniad i gyfuno amryw o'r cynlluniau unigol o fewn gwahanol benawdau. Byddai hyn yn cynnwys dull amgen o gofnodi budd ariannol y newidiadau sy'n deillio o weithio mewn dull mwy effeithlon. Erbyn hyn, deallaf bwriedir cyflwyno'r adroddiad yma i'r Cabinet ar 13 Chwefror 2018 a pe bai'r cynnig yn derbyn cymeradwyaeth, rhagwelir y gellir ystyried yn fuan y bydd swm sylweddol o'r arbedion o fewn cynlluniau 2017/18 yn cael ei wireddu yn amserol.

Mae adroddiad yr Aelod Cabinet Plant, gyflwynwyd i'r Cabinet ar 9 Ionawr, yn cyfeirio at yr her o wireddu'r cynlluniau arbedion eleni ac, o bosib, gweddill arbedion y cynllun "Gwella Buddiannau trwy Drawsffurfio Gwasanaethau Plant" fel ag oedd wedi ei ragweld. Mae'n amlwg bod y sefyllfa o ran cyllido gofal plant yn faes sy'n creu pryder i sawl awdurdod lleol, a dwi'n annog yr Aelod Cabinet Plant i gyflwyno canlyniad yr adolygiad y cyfeirwyd ato yn ei adroddiad mor fuan ag y bo modd, er galluogi i'r Cabinet ystyried yr angen i'r Adran Plant gyflwyno cynllun amgen i wireddu'r arbedion ariannol perthnasol.

Mae un cynllun yn yr Adran Priffyrdd yn parhau i greu pryder, ac mae camau ar y gweill i gyflwyno adroddiad i'r Pwyllgor Craffu er mwyn ystyried y sefyllfa, ac o bosib, cefnogi dull amgen o wireddu'r arbediad yn llawn.

#### **4. CASGLIAD**

Yn gyffredinol, rwy'n fodlon iawn gyda'r cynnydd sydd wedi ei wneud yn ddiweddar i wireddu'r hyn oedd wedi llithro o'r cynlluniau hanesyddol. Ymhellach, mae'r rhagolygon o ran cynlluniau 2017/18 sy'n weddill hefyd ar y cyfan yn addawol iawn. Wrth gwrs, bydd angen i'r holl Aelodau Cabinet barhau i fonitro'r cynlluniau arbedion ac rwy'n ymwybodol bod y gwaith yma yn mynd rhagddo. Felly, gofynnaf i'r Cabinet nodi'r cynnydd calonogol tuag at wireddu'r cynlluniau arbedion 2015/16 - 2017/18.

---

#### **Barn yr Aelod Lleol**

Dim yn berthnasol

#### **Barn y Swyddogion Statudol**

#### **Y Swyddog Monitro:**

Dim sylwadau o safbwynt priodoldeb.

#### **Y Pennaeth Cyllid:**

Rwyf wedi cydweithio gyda'r Aelod Cabinet i baratoi'r adroddiad yma ac yn cadarnhau'r cynnwys.

#### **Atodiadau:**

Atodiad 1 – Trosolwg Cynlluniau Arbedion 2016/17 fesul adran

Atodiad 2 – Trosolwg Cynlluniau Arbedion 2017/18 fesul adran